


Mateo 26



Enem neng
eldew mura
dumateng
Pegkenkaan et
Kerendeman et Neketalib
tagna', si Jesus diminateng
dut lungsud et Betania,
lungsud na pegeldengan
i Lasaro, na binyag i
Jesus peuli'. Si Maria, kenye
nengisi' et tenga' litro et merga'
neng bebengluen neng nardu, indyari binuak
ye dut tiked i Jesus. Pegketbes, rinipnasan ye
et buek ye. Sinet ne et benglu seled benwa.

1

Si Judas Iskariote, sembatung pepengenanran i Jesus,
siminurung dut menge' pegibuten et menge' pari'
apang ipegdagang si Jesus kedye.
Nenep dye pegkekingeg et
beres ye. Inekuanan dye
begeyan ya et pirak.
Angkansa, nenulus si
Judas et timpu
apang ipegdagang
si Jesus.



2

Inandel et menge' pepengeneran itueng tinehagan i Jesus, indyari pinanyap dye ne itueng Kenkaan et Nektalib. Sasat memegkekaan dye, nemurut et bengbang si Jesus, indyari netbes ye ga megpeselamat dut Empu', kenyeng pinegbisbitas ampa' ne binggey eset menge' pepengeneran ye. Kwan ye, "Kewaa' myu itu beke' kanen, itu ne daken neng bilug."



3

Kineptan ye alak et ubas eset sawan, negpeselamat ki Empu', indyari binggey eset kedye, kwan ye, "Ginsan kew menginum et itue. Sabab itueng alak et ubas antangan ye dugu' ku ne, dugu' et tenda't bagung pinegsulitan et Empu' dut taaw ye. Itue daken neng dugu' meula' dut kemeteyan ku punsabab et kemeapan et menge' keselaan et kineldaman."




4

"Simon, inangat i Seytan na sulayan ke samat pegtaap et begas apang mepili' in. Segwa' negpenalang ku dut Empu' pasal dimu, na dimung pengandel diki lang meraag. Na ba' ikew kepeuli' ne, ipebesaga' pegandel et menge' iba mung pepengeneran."



5

Segwa' siminambag si Simon, kwan ye, "Begerar, timbes ku ne nemikir, mibut ku dimu misan dut pipirisuan beke' dut kepeteyan." Siminambag si Jesus, kwan ye, "Isugid ku dimu Pedro, mura sibantu' memalu' lumbu', meketlu mu ne aku pinesunguan na kwanen mu na diki mu aku kilala."



6

Indyari pinebaya' kenyeng menge' pepengeneran i Jesus dut sembatung luluwakan na pegngeranan Getsemani. Sinugid ye dut kedye, "Atu' kew mena, sasat aku dumuntin beke' megpenelang ku dut tamar duntin."



7

Kwan ye, "Abba (gay bersen, Ama' ku), kayang ginis na diki mu mekeradya. Ugara' et daken itueng keliyutan beke' kemeteyan neng melebayan ku. Segwa', diki et gay ku ba' diki gay mu nega."




8

Angkansa si Judas neperuntin dut Keluluwakanan neng Olibo, megtuturun dut menge' kesusundeluan et taw't Roma beke' mekansang neng mengdiydaga dinaak et menge' pegibuten et pari' beke' menge' Pariseo. Maya bibit dye menge' pelyatut, sisiluan, beke' gelaman. Indyari maya ne sembatu kedye neketigbas dut sembatung uripen et metaas na' pari', nesampal kewanan neng telinga ye. Segwa' kwan i Jesus, "Tengewi' ne atin!" Ampa' ne, dimpen ye telinga et uripen in, indyari megtuy ne negulinan.



9

Sinagkew dye si Jesus, pegketbes binibit dye ya dut seled benwa et metaas na' pari'. Indyari nibut nega si Pedro dut kenye, segwa' dut mere'rayu' lang. Ganang pemegnengnarang menge' ibang taaw neng nemegsesarung ne dut tenga't legwas et benwa et metaas na' pari', memegarung dye ginsan, peiibut si Pedro kedye.




10

Nengingkut sembatung tetehagen et Metaas neng Pari' na kampung et ating tetehagen na tinigbas i Pedro telinga ye nengingkut kenye, kwan ye, "Diki be ikew atin na nebiri' ku in na iba-iba ye dut Keluluwakan et Olibo?" Negpeilu gasi peuli' si Pedro. Negdingan lang et atin kiminerengek manuk. Pagka' kwantin ne, liminiwan si Pedro, dun ne ya siminiyak banar.




11

Pegketbes nemeniyeg ne ginsa't nemegurung-urung in, ampa' ne binibit si Jesus dut ki Gobernador Pilato. Angkansa iningkut i Pilato si Jesus, kwan ye, "Ikew ne be tu' surutan et menge' taw't Judio?" Sambag i Jesus, "Banar samat pegsugiren mu in."




12

Sabab et gaay i Pilato na ipeliwan si Jesus angkansa negberes gasi peuli'. Segwa' kaya ne memegtitinep mara dye, kwan dye, "Iransang dut krus, iransang dut krus, iransang dut krus!"



13

Pegketbes et atin, binggey i Pilato kedye si Jesus apang iransang. Angkansa, insi' et menge' sundalu si Jesus. Pinepsan dye si Jesus et krus pesurung dut pegderetunan et "Bengkarak et Taaw" na pegngeranen dut bebresen et Hebreo atin "Golgota."




14

Atue e rinensangan kenye dut krus et kayu. Beke' maya duwa neginabu rinansang atin neng masa. Pineglimbangan dye ya, si Jesus, ne dut pinegketngaan dye.



15


Sabab eldew kaya negey et binyar ye, beke' kumut neng dininding dut seled na' pengempuan na' benwa in, diminingan lang neuyat tenga'. Indyari negberes si Jesus et mebasag kwan ye, "Ama' Empu' dut langit, ipengarap ku dut keremut mu daken neng kurudua." Ganang nebres ye lang itue, nebugtuan net ginawa.



16

Ganang mapun et Eldew et Pegsakap, gay bersen, mura Eldew et Kepeternan, inurem i Jose surungan si Pilato apang engaten ye bilug i Jesus. Taw't lungsud et Arimatea si Jose beke' sembatung pegibuten neng

pegesipen dut Sanedrin. Megtetagey ya gasi et pegmilik et Empu'.



17

Nengelen si Jose et kedilew apang ibulung ye et bilug i Jesus neng dinatun ye dut batu neng binaal et lebeng, pegketbes tinelubid ye kelang batu dut lelelengan et lebeng apang itengleb.



18

Ating eldew Biyirnis, na atin Eldew et Pegpanyap et menge' taw't Judio dut Sabadu neng Eldew et Kepeternan dye.




19

Kinedikleman, ganang Eldew et Kepeternan dye, nemegdingdingan ne siminurung dut ki Gobernador Pilato itueng menge' pegibuten neng pari' beke' menge' pari' na' Pariseo.



20

Sinugid dye kenye, "Begerar, nerendeman kay ne, na sinugid et atin neng mengrurunding nekeunang biyag nega ya ti', na ya in kunu' megbiyag nega peuli' teyeg et kepeteyan negketalib et telung eldew.



21

Angkansa nemengduntin dye ne ampa' pinengdetunan et tenda' dut ating kelang batu pinegulungan eset lelewangan beke' pinetunguan ating lebung apang metantu dyena diki itue penglemuran et misan sinu.



22

Mekelabay Eldew et Kepeternan et menge' taw't Judio, kukueldew et Lingsu neng unang eldew et senglinggu, siminurung dut lebung i Jesus de Maria Magdalena beke' itueng sembatu negang Maria.


Megtuy yiminegyeg et mebasag.



23

Nineug mewanan dut langit sembatung dereakan et Empu', beke' pinegulung itueng batung neketembel dut lebung, indyari narung ne dut timbew ti'. Nenggerger et takut itueng menge' menununggu,

indyari negba' samat patey mene ganang mebiri' dye itueng dereakan et Empu'.



24

Segwa' sinugid et dereakan et Empu' dut menge' kelilubunan, kwan ye, "Kas kew takut. Sewd ku na pegtulusen myu si Jesus na rinansang dut krus. Kaya ne Ya atu', sabab ya in negbiyag ne peuli' na samat kenyeng sinugid in.

Ani' kew, siyeki' myu dinetunan kenye ni'."




25

Indyari de'dali' dye ne nugad eset lebung ti'. Pinegmilikan dye't meglelamud takut beke' keksan. Indyari agen darak ne siminurung eset menge' pepengeneran i Jesus apang ituturan itueng neinabu.



26

Na' bigla', sinusup dye i Jesus beke' pinanling ye kedye, kwan ye, "Kesenangan dimyu." Indyari nemengabi' dye ne, siminelukud eset kenyeng titikeraan ampa' dye ne kinekepan tiked ye supaya nemengempu' dye ne kenye.



27

Ingga nekwit nepebiri' gasi ya dut sempulu' isa neng pepengenan ye ganang megkekaan dye. Inusiatan ye dye sabab et kektulan et ulu dye beke' sabab et kaya lang pemengarap dut menge' iba neng nekebiri' kenye pegketbes et pegbiyag ye peuli'. Angkansa, pegketbes neres kedye si Begerar Jesus, pineribuwat ya dut lelegdangan et Empu' beke' narung set kewanan et Empu' Ama'.

28

Sabab mekasi banar Empu' eset menge' taaw atue't sengkedunyaan, ne binggey ye kenyeng bugtung na Yegang supaya isimaya', supaya sebarang mengandel kenye diki lang metiksa' dut Narka', segwa' maya biyag na' kaya seskeran dut elepan et Empu' Banar.

54

60

29

Roma 3:23 Sabab ginsan negkesala' beke' diki nekeapet dut ketaasan et Empu'.

Roma 6:23 Sabab kebeyaran et keselaan kepeteyan, segwa' ating bebgey et Empu' biyag ne kaya seskeran dut pekikisembatu ki Kristo Jesus na Begerar tyu.

Hebreo 9:27 Tinimpuan taaw kasa ga matey, pegketbes atin dumateng ating pegukum et Empu'.

Epeso 2:8,9 Sabab eset redyiki' et Empu', atin ne angka nepuwas kew ganang nengandel kew ne ki Kristo. Sabab lein lang itue punsabab eset dimyung pegkeredyanen na kemyu mepuwas, temed erapun itue bebgey dimyu mawa' et Empu'. Kaya misan sinu megmeabbu sabab nepuwas kew itue lein lang eset dimyung keradya.

30

Roma 10:9,10 Ba' ipesebanar mu ne, kwan, "Si Jesus, atin Begerar ku" beke' mengandel ke dut atey mu na ya binyag et Empu' teyeg et kepeteyan, mebawi' ke. Sabab pengandel ke pebiya' dut pusu' angka pinepantun ke et metigna' dut pemiri' et Empu', beke' pepebnar ke gasi na si Jesus atin Begerar mu pebiya' dut baba' mu angka nebawi' ke

Juan 3:16,17 Sabab mekasi banar Empu' eset menge' taaw atue't sengkedunyaan, ne binggey ye kenyeng bugtung na Yegang supaya isimaya', supaya sebarang mengandel kenye diki lang metiksa' dut Narka', segwa' maya biyag na' kaya seskeran dut elepan et Empu' Banar. Sabab diki lang pinelusu et Empu' kenyeng yegang supaya ukuman apang dusaen menge' taaw atue't sengkedunyaan, imbes supaya puwasen ye menge' taaw mawa't keselaan dye.

31

1 Juan 5:11-13

Indyari itue ne pesebanar: Dinuuul ne kityu et Empu' biyag na kaya seskeran beke' biyag ne itue meterima tyu lang pebiya' eset Yegang Ye. Sebarang pegtetegan et Yegang et Empu' in, maya biyag na kaya seskeran. Segwa' sebarang diki pegtetegan et Yegang et Empu' in, kaya biyag eset kenye. Pegsuraten ku itue dimyu apang mesewran myu na kemyung mengengandel dut Yegang et Empu' in maya biyag na kaya seskeran.

32

Mateo 26-28; Lukas 22-24; Juan 13-21

Storyline by: Edward D. Hughes

Illustrated by: Janie Forest
and Alastair Paterson

Adapted by: Lyn Doerksen

Palawano, Brooke's Point NT (plw) © 2018,
Wycliffe Bible Translators, Inc. All rights reserved.

<https://live.bible.is/bible/PLWWBT/MAT/1>

©2026 Bible for Children, Inc.

www.M1914.org

www.bibleforchildren.org